

Et Fröhjohr kütt

Hubert Grunow - MundArt, Windeck

www.hubert-grunow.de/grunow-tenor/mundart-lesungen/

Mein Gott, wat et eemolen alles ussschleeh!

Wat en Jelöck, dat mer d'n Wönkter vü rbei han!

Mem Fastelovend fengt et aan.

Wann se sich all henger d'n Masken verstaichen. Un die Ööjelchjer gohn.

„Wer maach et sin?“

Het sich ald manch jung Fraumensch als en ahl Schrapnell erusjestallt.

De Been ganz schüüen, kumm Krampoderen, däät et och noch fein tanzen un kokettieren, wa? Mein lieber Schulli! Haddet sich wohl vam Pastuur rechtzeitig en Jeneralamnestie usstellen looßen, de Abseletion für all Fäll, in die mer als Fraumensch su kunn kann, wann de Männer sprängen un biießen wie de Frellen en d'r See.

Mer muß sich eben ze hellefen wossen, ne wohr?

Wofür sull die löstije Zick dann goot sin, wann nit für en jediejenes Fisternöll.

Un wann'r noch zwei oder drei erusprängen, -

Wemm'r jo wüss, wofür et goot wör?!

Un de Música un d'r Schabau dohn ihr Deel dozo.

Höppen un tanzen, sich wöngen un drähen, dat Stippeföttchen...

git heeb Bloot!

Fröhjohr! Ech saren et jo!

Kütt su männichen Heeblööfer, der kuet dovüür de Eerd kumm üvvergohn kunnt: Ming Knauchen! Mingen Blutdruck! Mingen Zucker!...

Wo osse?

Plötzlich alles en bester Ordnung!

Met jedem Strahl vun d'r Sunn steejen de Säfte, wie en d'n Böömen och, en d'n Planzen, bei d'n dooven Dieren.

Nä wat sin se am Mauzen, de Meuter, un am Spoken! Daach un Nääch, nit

usszehalen, fäjen sich, bießen sich, schreien wie kleen Küngder.

Peffer streuen maach ald ess d'n een oder anderen Deens doon. Ävver kusch kriss de die su flöck nit!

Sin jo völlig unscheniert, die Dier. Kennen jo och gar kin Schämde, dat se wossen, wat sich jehüürt un wat nit.

Et git jo och Konsooeten, die geern fillemen – mot d'r Kamera – em Fröhjohr – em Bösch.

Ganze Rollen hann se doheem – oder bruchen se nit mieh!, weil jo keener, nit eener, jet motneehn kann, op d'r letzten Rees -, die se dann beluuren – mot allen mööchlijen ‚Dieren‘ henger Strüchen un Böömen un Autos, op ener Decke, op ener Lichtung...

Un wat do passiert, kennemir, wann nit uss eejener Anschauung, weil et jo für jewöhnlich düster ess!, dann jo van d'r Prozession.

Do kannste ess widder sehen, wat su en Prozession bilden kann!

Jung, do brutts de für et Laachen nit ze sorjen! Do wor kin Andääch mieh, wie mir vam Berjer Kapellchen op d'n Dall losszochen. D'r Bulli op d'r Weed hatt d'n Zachabel ussjepack un stooch wie jeck op die ärem Kooh en, die och noch sing ganz schwer Jewicht draaren mutt. Un hä schamt sich keenen Baschten! Ejal wievill Lück do am Bedden un Söngen woren.

D'n schmerzhaften Ruuesenkranz kunnts de do ävver flöck en de Taische dohn. De Blossmúsica blees nur noch Keu, all hatten „ die Auren links“, un jedereener wuß, wat Saache wor.

Hüür mer op, gank mer fott! Us bruchs de nix lieren!

Mer kann och eenfach nur en d'n Gaaden gohn, ömgraaven, planzen,

säen, behööfen, Stickelsrieser setzen, d'n Hummelen un Weißpelzen zoluuren, d'n Väuelen, wie se ihr Nester bauen un wie doll hin- un herfleejen, wann se ihr Kleenen fooderen müssen.

Alles schüüen – un de Liebe – un d'r Mai.

Do kütt se, de Maikönijin! Wat sütt se eemol fein uss en ihrem herrlijen Staat, mem Krönchen op, d'm Struuß uss Maiglöckchen un d'm Maikönig em Ärem. En d'r Kutsche kunn se vüürjevahren, üvverall stohn Birkenrieser met bonten Schleefen draan. De Küngder draaren de Maibööjen, wofür se am Maiboom späder, nohm Zoch, en lecker lis vom Maipaar kreien.

Huh en d'r Luft hengt d'r Pajass am Maiboom, Zeechen für d'n Wönkter, dän se am Boom opjeknöppt han.

Nu besoch d'r dat ess: Et Weißen Marie -als Maimotter- hatt domols en ussjestuppt Maimädchen erinjahangen mot BH, jestriftem Rock un ener Perücke om Kopp met langen, blunden Hooren draan.

„Der Mai ist gekommen“, süngen se üvverall. All sin se fruh, dat et wärmer wit un mer sich widder dobussen ophalen kann.

De Bööm, die blöen, un de Bloomen gevvnen herrlijen Duff avv: de Saumeleken, de Käsblömchjer, ganze Wisen voll en gill un wieß, de Veilchjer un natürlich d'r Flieder. Wat en Pracht!

Et ess Fröhjohr! En Fess für all Sinne!

De Lück können widder vüür et Loch un treffen sich für en Schwätzjen op d'r Strooß oder gohn en d'n Gaaden zom Nohperen oder op en Tass Kaffe.

Wer also leever dobinnen hucken blieven will, der sull dat dohn. Mich zücht et eruss.

„Alle Vögel sind schon da..“ - Ech och!